

GALDER BARBADOREN TESTIGANTZA:

“Pasa den hilabetean kotxean gindoazela, lau lagun gelditu gintuen Guardia Zibilak errepideko kontrol batean. Hasieran “normala” izan zen kontrola, baina denbora pasa ahala gaiztotzen joan zen. Ordu eta erdi baino gehiago eman genuen kontrolean, mendira begira, eskuak kanpoan, sakabanatuta eta euripean.

“Kontrolean egon eta ordu erdira, kamuflatutako bi kotxe agertu ziren, eta ia denek zuten aurpegia estalirik. Beraietako batek hitz egiten zuen soilik, eta Harley ezizenarekin aurkeztu zitzaigun.

“Banan-banan pista baten sarrerara eraman gintuen galdeketa egiteko, eta bertan izan zen lehen kolaborazio eskaintza egin zidan unea. Nire egoera zein zen bazekiela, ni ezagutzen ninduela eta bazekiela zein izan den nire papera gazte-mugimenduan. Nik gauzak kontatzen banizkion epaiketarekin lagundu ahalko zidala esan zidan, eta Bilbon kafe bat hartzera gonbidatu ninduen.

“Ezezkoa eman nionean esan zidan lasai egoteko, bazekiela non bizi nintzen eta non topatu ahal ninduen, eta bi asteren buruan nirekin kontaktatuko zuela.

“Duela bi aste telefono baten deia jaso nuen. Deia erantzutean, “Que pasa Galder te acuerdas de mi? Soy harley, que tal estás?”, esan zidan. Ahotsagatik bera zela banekien, eta telefonoa eseki nuen. Goiz osoa deika ibili eta nik erantzuten ez niola ikustean SMS bat bidali zidan hau esanez: “Galder, soy Harley, que no se si te cojo bien, solo para preguntar que tal fue el finde, que espero que bien y que me gustaría hablar contigo de manera reservada y sin ningun tipo de compromiso para hacerte una propuesta que pudiera ser de tu interés”.

“Astelehen honetan gauean Amurrion nengoela, kotxera sartu nintzen etxera joateko, eta pertsona bat nire atzetik etorri zen. Polizia zela ikusi nuenean, kotxetik jaitsi eta berarengana joan nintzen herritik alde egiteko eta bakean uzteko eskatuz. Berak barre egin eta geldirik geratu zen denbora luzez ni joan nintzen arte.

“Astearte eta asteazken honetan nire lagun bati ere bi telefonotatik deitu diote, nitaz galdezka eta termino berdinetan: “Que dónde esta Galder, que si estás con él, que no le localizamos.” Nire lagunak ea nortzuk ziren galdetzerakoan “Uy, pues nos habremos equivocado esaten zioten”.